

SCRIPT OF MORNING GOJRI NEWS BULLETIN 22JAN 2026 1015HRS

مارننگ گوجری نیوز بولٹن 22 جنوری 2026

یوہ آکاشوانی جموں بے محمد اکرم تیں خبر سنو۔

LG STATEHOOD DAY

جموں کشمیر لوک بھون نے کل جموں مانہہ تریپورہ منی پور تے میگھالیہ گو یوم ریاست منایو۔ آکاشوانی جموں گا نامہ نگار نے اطلاع دتی ہے کہ ثقافتی شام ایک بھارت شریسٹھ بھارت گا جذبہ نانہہ مناتاں واں طلباء سیکورٹی اہلکاراں تے یو ٹی مانہہ ربن آلا تریپورہ میگھالیہ تے منی پور گا لوکاں نانہہ اکٹھا کیو۔ لیفٹیننٹ گورنر منوج سنہا نے اپنا خطاب مانہہ کہیو کہ تریپورہ۔ میگھالیہ تے منی پور گو ثقافتی تنوع تے بھرپور ورثو خطہ مانہہ ترقی واسطے ایک طاقتور انجن گا طور ور کم کر رہیو ہے۔ انہاں نے کہیو کہ وزیر اعظم نریندر مودی گی قیادت مانہہ خطہ نے تاریخی ترقی دیکھی ہے۔

SATISH JITENDRA MEET

کھیڈاں غا وزیر ستیش شرما نے کل مرکزی وزیر ڈاکٹر جتندر سنگھ نال ملاقات کی تے جموں کشمیر تیں متعلق بڑا پیمانہ ور ترقیاتی مسائل ور گل بات کی ستیش شرما نے مرکزی وزیر نانہہ یو ٹی انتظامیہ غی طرفوں جاری ترقیاتی اقدامات تیں آگاہ کیو۔ انہاں نے اس گل ور زور پایو ہے جے خط مانہہ اہم شعباں مانہہ ترقی غی رفتار نانہہ مزید تیز کرن واسطے تال میل تے مرکز گا تعاون غی لوڑ ہے اس دوران بنیادی ڈھانچہ گی ترقی ور ایک تفصیلی گل بات ہوئی ہے جس مانہہ وزیر ستیش شرما نے سڑکاں گا ڈھانچہ، عوامی سہولیات تے شہری بنیادی ڈھانچہ تیں متعلق بڑا منصوباں نانہہ تیز کرن غی ضرورت ور زور دتو ہے۔

SATISH DIRECT SELLING

عوامی تقسیم کاری تے صارفین امور گا وزیر ستیش شرما نے کل ہندوستان مانہہ برائے راست فروخت گا شعبہ مانہہ پائیداد ترقی نانہہ یقینی بنان واسطے شفافیت صارفین گا اعتماد تے تکنیک کاری نال چلن آلا ضابطہ غی ضرورت ور زور پایو۔ وزیر موصوف 6 ویں ڈائریکٹ کنکلیو سیلنگ 2026 نال حیات سنٹرک نوین دلی مانہہ خطاب کر رہیا تھا جس نے پالیسی سازاں ریگولیٹرس صنعت گا لیڈراں تے قومی شخصیات نانہہ ایک مشترکہ پلیٹ فارم ور اکٹھا کیو ہے۔ اجتماع نال خطاب کرتا واں ستیش شرما نے کہیو کہ صارفین گو اعتماد کسے وی معاشی نظام غی ریڑھ غی بڈی گی حیثیت رکھے انہاں نے زور دتو کہ ڈائریکٹ سیلنگ صنعت غی ساکھ تے بطویل مدتی استحکام واسطے اخلاقی طریقاں تے ریگولیٹری تعمیل گی سختی نال پابندی ضروری ہے۔

DAR DEVP ISSUES

دیہی ترقی محکمہ تے پنچائتی راج گا وزیر جاوید احمد ڈار نے کل سیول سیکرٹریٹ جموں مانہ کنیں وفود تے انفرادی طور آیا لوکان نال ملاقات کی۔ تاکہ ترقیاتی کمان تے خدمات گا معاملات غے متعلق مسائل گو جانیزو لیو جاسکے، تے اُن غو حل کڈیو جے۔ جموں ادھمپور تے کشمیر گا بکھ بکھ ضلعان تیں آیا بکھ بکھ وفود نے دیہی بُنیادی ڈھانچہ سڑکان گا رابطہ آپاشی غی سہولیات پین گا پانی غی فراہمی پنچائتی راج سکیمان غا نفاذ، روزگار تیں متعلق مسائل تے زیر التواء ترقیاتی منصوبان گا بارہ مانہ خدشات نانہہ اُجاگر کیو ہے۔ وزیر موصوف نے موقع ور ہی متعلقہ محکمان نانہہ مسائل گا جلد تے جلد ازالہ کی ہدایت کی، اُنہان نے زور دے غے کہیو کہ حکومت تھلے غی سطح ور ترقیاتی کمان نانہہ تیز کرن ور توجہ مرکوز کررئی ہے۔

SPL TRAIN

شمالی ریلوے غا جموں ڈویزن نے بدھ گے روز مسافران کی بدتی وی منگ نانہہ پورو کرن واسطے نویں دلی تے شری ماتا ویشنو دیوی کٹڑہ غے بشکار ایک خصوصی ریزروڈ ریل خدمات مانہہ توسیع گو اعلان کیو ہے آکاشوانی جموں گا نامہ نگار نے اطلاع دتی ہے کہ ریل گڈی نمبر 04081 نویں دلی تیں کٹڑہ 23 تے 26 جنوری تک چار اضافی سفراں واسطے چلے غی، جد کہ ریل گڈی نمبر 04082 کٹڑہ توں نویں دلی واسطے 24 جنوری توں 27 جنوری تک چلے غی۔ سننیر ڈویزن کمرشل منیجر اوچت سنگل نے کہیو کہ اس تیں پہلاں وی اس ریل گڈی مانہہ تقریباً 1 سو فی صد سیٹ پری رنیں تھی، جس غی وجہ تیں یہ ریل گڈی مسافراں واسطے ایک سستو تے فائدہ مند سفر گو ذریعو ثابت ہو رئی ہے۔

PROG ANN

علاقائی خیراں آلو شعبو آکاشوانی جموں 23 جنوری 2026 نانہہ قومی یوم شجاعت غا موقع ور 25 منٹان گو ایک خصوصی گل بات گو پروگرام منعقد کرے غو اس خصوصی نشریات غو موضوع شجاعت تیں ترغیب، نیتاجی غا خیالات تے اج غو بھارت، رکھیو کیو ہے۔ تے یاہ نشریات 23 جنوری نانہہ تہاڑی غا 12 بجے براہ راست سنی جاسکے جس مانہہ ماری مہمان وین غی پروفیسر ششی پرہیا جہیڑی پروگرام غا موضوع ور اپنی رائے رکھیں غی پروگرام غی میزبانی کریں گا مارا انگر وجے بجاج۔
